


東萊詩集 十三之六



漢書門			
類	號	函	架
三	四	九	〇
六	六	〇	〇
冊	架	函	號

內閣文庫			
漢書		特四十一類	
函	架	號	冊
三	四	九	〇
六	六	〇	〇

內閣文庫			
番號	漢	3490	
冊數	6	( 5 )	
函號	別	41	4



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak





淺草文庫

東萊先生詩集卷第十三

呂本中居仁

一 全州與解子中向伯恭相會

五年流落判西東尚喜交游一再逢但得低頭拜東

野不妨下卧見元龍中原極目山千疊往事傷心酒

一 鍾如我支離久無用敢因窮約廢過從一作費

初至桂州二首

連年走遐方所至若郵傳未論道艱阻先問米貴賤

賊勢來未已行役我已倦解鞍志空館敢歎此異縣

清泉上短絆一洗塵垢面瘡痍非不深美醞良可戀

胡沙久衝突賊馬亦馳騫我行不得息終歲在道路

敢言更事多尚恐與時忤低頭訪殊俗何處可放步



江流下滄海日慘蛟鱷怒出門尋故人風雨已斷渡  
桂林解石拜見仲古龍圖吉父學士別後得  
兩詩書懷奉寄

所至艱危稟如何更別離只看山似戟已合鬢如絲  
湯熨徒增病文章不療飢端居渴餘論苦語自成詩  
折老父高卧嘗卿仍倦游同爲萬里走肯避數年留  
賊幟江湖晚嵐煙嶺嶠秋相逢得安穩乘興莫東流  
比聞二公皆欲  
爲廣東之行

次韻吉父見寄新句

詞源久矣多岐路句法相傳共一家良賈深藏宜有  
待大圭可寶在無瑕長江渺渺看秋注孤霧悠悠伴  
落霞盛欲寄書商榷此嶺南不見鴈行斜

桂州水西

隆隆而雷風乘之斷霓落日江東西江頭古寺頗岑  
寂僧簷正與南山齊我來端坐已寒暑終日看山默  
無語盜賊連村那敢問藜苜充腸未爲苦旱禾已旱  
心所知正待前山一作山前一犁雨

斷橋三月中作

橋斷客逾少春深花已休閉門尤省事於世轉無求  
來往只諸老相期非壯游欲知身所一作同寓嘗言家洲

時獨范叔過季平裘  
時貶叔過從也

贈嶺東陳秀才



風吹賀江浪如雪浮梁左右行人絕病夫坐穩懶出  
行破屋只愁吹瓦裂東縣陳卿忽叩門笑語驩然相  
暖熱怪我長貧走道路所至不安寧有說鄰州賊報  
又警急欲泛扁舟窮百粵如君長材亦未用獨守區  
區負竒節未能俯首効兒輩肯便出門探虎穴馬羣  
時致千里足烈士寧無一時傑我復何人敢言事一  
世摧頽甘短拙辛君無事時一過喜聽高談健其決  
瘡癘參差畏久留歲月崢嶸惜輕別

衡州逢解子中別後奉寄

我來筠水陽君亦發章貢相逢瀟湘門及此兵未動  
卧聞羽書馳起已行者衆匆匆不及款尚辱苦語送  
慨然念平生相從已如夢交游半生死所至多罅縫  
我衰學不入一作及君亦老未用孰知一世中有此九  
鼎重子賤則君子閔子言必中師門未遽絕斯文實  
天奉別離又幾日坐想發孤諷衡州逼南嶽湘水寒  
不凍頗傳江西擾盜賊已放縱往從田蘇游此樂不  
得共

范縣丞惠雙鷄

羸病不能除肉味每逢齋鉢愧餘生雙鷄未可爲公  
饌留與山僧報五更

三撫幹失去毛裘

王郎隨身一駝裘偷兒遽作壑失舟春初未免霜露



迫逼一作歲晚可無遷徙憂客房夜坐薪當燭不怕近  
江風裂屋馬平編戶更艱難君行莫忘民號寒

四十二弟將還賓州相過夜話

兵戈久未歇所至轉搶攘萬里逢吾弟三年走瘴鄉  
春風入古寺夜雨暗浮梁尚肯留連否僧廬可坐牀

呈折仲古四首

市酒酸甜久絕沽濕薪熏眼坐僧爐尚憐諸老無機

一作幾事不待愁人折簡呼

龍閣老翁流落久如今辛苦去朝天向來嶺海經行  
地分付蠻溪著釣船

已無厚祿故人書尚有相尋長者車所至紛然兵火

裏不知從此更何如

疾病侵凌百不能只今全是住庵僧謝安肯為蒼生

起早與吾君了中興

次韻王撫幹見惠

新春忽忽到庭除短褐經一作輕寒病却蘇漫以詩書

教兒子嬾耕薪水倩童奴天涯每覺人情薄眼界何

知風景殊萬里相逢君莫歎好山無數簇城隅

次韻王漕見贈并寄曾吉父二首

前賢去則遠今代不無人小出已無敵深藏恐未仁

兩章知思苦一語見情親徑欲忘衰病知公筆有神

曾子住南國端居無所思逃禪不用酒投筆謾成詩



敏捷忘千慮縱橫又一奇於中有佳處莫待折肱醫

次韻折仲古見贈

未有絲毫補縣官幾年流轉但求安江湖自稱嵇康  
嬾故舊空嗟范叔寒顧我初無食肉相喜公復著侍  
臣冠新詩不忘東山一作平戎志敢作尋常禁近春

再用前韻奉和

自昔支離畏一作怕作官只今猶望一枝安飽知時態  
病良已心喜故人盟未寒所至軍書銷日月幾回戎  
馬汚衣冠公歸定有安邊策不學愚夫靜處看

夜坐有感

五更月落鷄未鳴小爐殘火猶晶熒道人強起理衰  
疾不聞松聲聞雨聲跣趺坐穩百念去豈有宿夢令  
神驚平生於世萬事嬾況復今茲飽憂患中原北望  
四千里三年不見南飛鴈著身天涯未為遠所至風  
沙莫深歎時寒但一作可赴僧房火日暖一作但赴鄰  
家飯嶺南無瘴便可老江頭有酒猶堪喚惜哉甯子  
不自休辛苦飯牛過夜半

送密上人歸江西

輕舟君先行羸馬我繼往湖山已在望南嶽行可仰  
不憂盜賊繁漸喜草木長密也負奇氣少已離塵網  
匏參諸方禪所至被稱賞獨留未後句未肯付吾黨  
徑尋卓錫地更足以自養囊空脚頗健體空心甚廣



喜談江西勝妙處猶如一作指掌未見頻寄書悠然發  
遐想

送常子正赴召二首

屬一作昔者居閑久今來促召頻但能消黨論便足掃  
胡塵衆水同歸海殊塗必問津如何彼黠虜敢誣漢  
一作無人

疾病老逾劇交親窮轉踈惟公不改舊怪我未安居  
日月干戈裏江山瘴癘餘因行見李白亦莫問何如  
頌送山上人游南華

二浙三衢未說歸且從嶺路訪曹溪盧公若問南來  
事但道江湖盡鼓鼙

山頌送譚師直歸湖南

人事日翻覆昔同今不然於心苟有用與世自無緣  
剩結官田社飽參雲蓋禪已勝高鳥盡徒泛五湖船  
送能化主還法輪

嶺外三年避賊忙法輪元不下禪牀君歸却說嶺南  
事瘴暑作時君自涼

送夏少曾兄弟

處處人家避賊忙數因行李問舟航江橫晚照鳧鷗  
亂春到空山草木香我未有緣離嶺嶠君今決策下  
湖湘定知此去添貧病不及相從氣味長

本中將爲江浙之行念當與夢賦送別感嘆



傷懷因成長韻奉呈

客行已無聊況此憂慮集頽然念遠役未見勇可習  
虛庭覺氣潤遠視螢火濕故人不我厭踏雨相勞揖  
朝餐共飢飽夜語同坐立問我去此邦何用如此急  
干戈與瘴癘未見可出入何殊知二五而不知有十  
俛首謝勤意此非愚所及天涯重離別所至方業岌  
感懷平生舊忍效兒女泣胡沙蔽中原道路滿荆棘  
世事古則然臨分莫於邑

贈日者張直夫

因循避世不求名潦倒江湖過一生賈誼定能尋季  
主子雲先已識君平獨行市肆口無語懶踏權門身

自輕看甌生塵直豎坐世間一作似君寧有不平鳴

永州西亭

舊聞西亭勝獨盛湖湘間山秀水亦好千里在憑欄  
今來乃不然眼境故未寬環城但濁水滿目唯荒山  
如何柳司馬肯爲此解顏始知憂慮久方覺所遇安  
我從避地來山水亦一作日飫觀初不厭嶺嶠況敢一作復  
嫌荆蠻徘徊念昔人亦作故意看所慙二三子來不  
倦躋攀開軒納微涼共享一日閑說詩到雅頌論文  
參誥盤快若箭破的圓於珠在盤此樂固可樂此盟  
安得寒天暑畏道路時危安一作多阻艱相逢得少款  
莫問何時還何須待杯酒始盡平生歡



浯溪

五月行人汗如雨意緒昏昏雜塵土浯溪一見中興  
碑便有清風濯煩暑中興之業誠艱難敢作漢武周  
宣看紛然大曆上元間文恬武嬉主則孱但知追咎  
一祿山袖手不作如旁觀天亦未使庸夫干故生李  
郭在人間一時節士張許顏其誰不知唐已安道州  
落筆風雨寒魯公大書鎮百蠻訶叱水怪摧神姦有  
臣若此世所歎而不能使君心還我來轉嶺逾千盪  
對此凜然清肺肝想見羣小遭譏彈爾曹何心猶誑  
謾至今怒髮常衝冠

送元上人歸來山

長囂而寂方作而息如射破的初不以力子居深山  
又處絕頂避囂不作二事俱屏往來臨川道里且千  
一見我喜如舊交然我欲屬子重於發言子請則堅  
之子之賢遍尋諸方不主先入唯是之從何拘何執  
惟昔善財我曹之師其心廣大誰能間之山高海深  
德則不孤不深不高培塿潢污奚必深山惟靜之守  
求寂念息以閱永久

贈一上人

偶從嶺嶠轉江東得向踈山見一公所至一作壽昔共游  
常草草爾來相遇更匆匆是郎埋骨虛無裏壁老收  
聲一作蒼莽中二十餘年往還事半隨秋鴈落



寒空

贈珪公杲公四首

北歸住江西塵事日窘束兩公時踵門高誼已絕俗  
空房擁殘火更許相就宿不嫌寒無檀肯厭飯脫粟  
杲公玉壺冰所至自清淨珪公出林鶴肯與鷄鶩競  
吾窮得兩公頗覺意氣盛未能出艱危猶足起衰病  
杲固昔所熟珪亦舊聞名江西一聚首遂寬南去程  
掃除文字習追尋香火盟期君向此道隱若一長城  
堂頭老居士我識蓋自早聲名從少年閉戶今却掃  
公能爲少留尚可慰枯槁欲知主人賢但看此二老

次韻錢遜叔清江圖後二首

公但一室堅坐我方萬里生還共作十年清夢同尋  
五嶺名山

作清江三兩曲勝大厦千萬間若保此中安坐不必  
中原遽還

次韻錢遜叔獨鶴圖三首

長頸踈身懶不前此寧有望更騰騫懿公愛爾非無  
意要壓曹人三百軒

粉墨半銷翎翅短正如衰髮不勝簪可憐少保功名  
悞寫此凌雲意不堪

眼明見此出籠鶴似我北歸辭瘴嵐御勿莫一作低頭  
待收養人間欣戚盡朝三



次韻錢遜叔畫圖

西風著人塵滿襟江山縱近難追尋當年寫此數幅  
妙坐使几案頻登臨斷雲黯慘出古寺遠岸杳靄連  
荒岑漁舟蕩漾江路晚煙雨濛籠山店陰已知落筆  
筆一作下氣象古一任世間消息沈最憐霜榦倚長石不  
待歲久成枯林知公此中興不淺此畫故能留意深  
只今燕坐一室裏尚費從來長短吟詩成掩卷坐秋  
晚一唱三歎求遺音

送一上人

我齒久已搖君髮日向白相逢不相笑共被老境迫  
周旋三十年近多多間隔伊昔無事時日夕望顏色  
此道要琢磨苦語費思索不能如宿心每負朋友責  
別我寧陵縣隨我昭德宅所期無二三可恨已千百  
交游大半死况值兵火厄舉首望八荒無乃天地窄  
涼風吹秋深江湖動行客誰能於此時際一作出語見  
肝膈胡塵蔽中原盜賊暗阡陌公其無遽行待我有  
良策

錢遜叔諸公賦石鼓文請同作

江頭羽書相續來城中草木凍不開腐儒坐視了無  
策但守寒爐吹死灰煩公送我石鼓文令我琢句要  
春回簸蕩風雲走一作蛟虺百蟲久蟄聞驚雷錢公  
自是力扛鼎持此浮游轉湖嶺漢碑秦篆已么麼况



復鍾士敢馳騁後來頗供兒女弄神物有知當遠屏  
石鼓之文公所知正是周室中興時庶幾我皇亦如  
此一掃狂虜隨風一作飛石鼓之文尚可讀小臣願  
繼車攻詩

和邢子堅韻

萬里重歸舊秃翁笑談聊復與君同鷓鴣所願一枝  
足鼯鼠從來一作五技窮短髮自梳渾欲白殘爐因  
客尚能紅正須混迹師元亮未忍低頭學敬通

東萊先生詩集卷第三

東萊先生詩集卷第四

呂本中居仁

戲呈東林雲門二老

幾年湖嶺費追尋尚喜歸來聽足音禦虎已知吾有  
命問禪方見子無心風塵黥慘病如昨歲月崢嶸窮  
至今猶覺相逢有餘恨老盆盛酒不同斟余常以謂可與共飲

者至難得也二公超然之韻可與共飲也而不  
得共飲為可痛惜曉此語者許伊具一隻眼

佛日縱步相尋索歸甚甚戲成絕句

相逢不用苦相催一作到更深月上回莫怪室空

無侍者夜窻相對有寒梅

東林珪雲門杲將如雪峯因成長韻奉送

東風被澤國君有千里行送君不能遠宿昔春水生



胡馬汚中原旁淮多賊城即今江南岸盜賊猶縱橫  
頗聞閩粵靜農民方及耕雪峯佳主人況欲屣履迎  
兩公與談道正欲平其衡但見演若頭自然心地明  
云何未覽鏡便欲其流清君行可語此勿憂兒女驚  
鄙夫牙齒缺苦遭塵事嬰七年在犇走一飽費經營  
野鶴出籠飛尚須宇翅翎今者與君別故鄉它日情  
新詩見萬一庶用託同盟

贈童堯詢蔡楠謝敏行

七年避胡塵無復少年事適從嶺外歸眼病不識字  
尚幸戎馬間得見此數士蔡童南城傑所養蓋有自  
兩謝名家子學已前作似相逢眼暫明已足慰遲暮  
如何捨我去使一作我起千慮江深月微寒况此月  
月驚猶餘大謝留與我相近住風霜眇墟落泥土暗  
道路得無經一作驚此別各復走它處期君則甚遠苦  
告一作語不厭屢微言恐遂絕其誰與一作知調護要當  
發憤求不欲一作未可僥倖遇聖門極坦平渠自有回互  
河清儻有期夫死或可俟

和范仲熊舜元游橘園見梅

橘林經一作雨未全衰歸路人家已見梅風物粗知  
一作如江左勝瘴煙新離嶺南來筆頭有眼方知妙句  
裏忘言始絕埃但得一寒無事過與公還往勝銜盃

答錢孫叔

一本有訪戴圖三字



北風吹霜夜如飛一作雪江城草木凍欲未一作折病夫

袖手無所為一坐臨川已三月忽蒙妙句起衰憊頓

覺和氣生毛髮公能忘機我亦倦不待曼殊見摩詰

畫圖是非久未解況保長年不摩滅請公置畫莫多

求要與時人除愛渴

與錢遜叔飲酒分韻得鳥字

客游等浮如藻一作萍歲事如過鳥逢公得一笑不厭古

寺悄雨聲喧客耳燭影吹半裊宿醒未及解更覺惡

韻擾時方足艱虞身未識要眇如何一杯酒便出萬

物一作事表別公願一言使一作今我意易了

贈別范一哥

相送不嫌遠詰朝當語離文詞知子進道路覺吾衰

力疾終無補徐行敢厭遲臨分更回首苦語漫成詩

送謙上人回建州三首

子來不憚千里遠我病可無終歲憂相見忽忽又相

別主人無恨一作厭客無求

平生苦節胡元仲老大多才劉致中為我殷勤問消

息十年堅坐想高風

遙山渡口晚猶寒道路奔波未許閑頗恨獨來不同

賞竹輿穿雨上踈山

與范益謙炳文叔儀步月一云與諸范步月

歲月忽已過羈窮非獨今稍勝分白水月影上清陰



畎畝平生事江湖它日心相過無百步猶覺費追尋

陸庭元紹意齋

聖人母意物我同大賢庶幾其屢空今君胡為用此  
意乃欲酬酢萬化參天工客來無窮君不厭所施不  
同皆有驗風寒燥濕互相伐一理驅除無頓漸衡門  
端一作宴坐一事無眾皆劫劫君有餘見賢不避忘其  
軀肯與俗子爭錙銖知君此意久已絕為爾病生吾  
有說侍儲百藥待百病任爾紛紛強分別君但守此  
心如鐵徧與眾生除眾熱是則名為無意訣剩放南

山一作窓著秋月

病中口占示益謙四弟

病來全少靜工夫藥裏關心計已迂縱使君來亦無  
語更無餘法待文殊

竹夫人

與君宿昔尚同床正坐西風一夜涼便學短檠牆角  
棄不如團扇篋中藏人情易變乃如此世事多虞只  
自傷却笑班姬與陳后一生辛苦望專房

郊居

紛紛俗駕不容攀尚喜郊居絕往還野寺並冬終日  
雨客房無事一秋閑平生談說舌猶在病起彫踈鬢  
已班始悟莊周太多事處夫才與不才間

送楊蒙秀才往樂平



我有閩粵役君成江浙行窮途一回首歲晚倍傷情  
佳氣占行在妖氛是賊營如何抱竒策不一請長纓

寄題旣尚卿雙蓮亭

異畝同穎久未出雙船共抵復何物今君何以得此  
花和氣所致無它術雙蓮共蒂中連理相映同心出  
秋水秋水池塘曉自涼雙蓮中含風露香飛燕姊妹  
一作不相妬並騁逸豔來昭陽自然容質見高韻不  
必粉黛呈新粧君家孝友聞近一作郡一作縣故使竒祥眼  
中見一洗東南戰鬪塵小人知之亦革面我來崎嶇  
山嶺間忽聞雙蓮能解顏請君更畫作圖看無使惡  
木譏雕殘

簡范信中鈐轄三首

交游契分如君少湖嶺溪山似此稀夾路梅花三十  
里故人雖病莫先歸

海角相逢又一竒更憐朋舊得追隨滿堂舉酒話疇  
昔疑是中原無事時

它日曹南十日雪訪君尋酒不能回梅花此日懷安  
路更有清詩入坐來

次韻李仲輔簽判

曉晴破雨却寒天海上風光絕可憐便欲陪公了春  
事不須乘醉始逃禪

西施舌



海上凡魚不識名百千生性一作命一杯羹無端更號

西施舌重與兒曹起妄情

### 和秦楚材直閣韻

胡馬南來議擊球忽聞羗虜斬揚酋虜中欲謀舉事則先為擊毬之

會漢宣帝時羗斬首惡一年春事妖氛退萬國歡

聲佳氣浮臺閣如君須強起林泉容我且歸休漢家

基業無窮盡早晚留侯與運籌

### 和展鉢詩

紛紛未了向來因同在浮漚寓此身顧我久拚菴外

事知公曾是箇中人齋盃已馱五鼎食詩卷初無一

點塵今代玉孫能樂此中興祥瑞不不歸不塵

### 鼓山

危欄不知高下瞰萬里路滄海近咫尺大舶不敢度

風雲遞舒卷川原更回互如何此道場乃倚絕壁住

得非化人居無乃仙聖寓斷崖石倒懸絕壑水暗聚

我行天一涯勝處時一遇衰病類一作九死餘已乏濟

勝具登臨茲一作茲忘返尚足慰遲暮山林與膏壤

未到已心悟

### 王傅巖起樂齋

人生各有樂所樂故不同吹竽與擊缶同在可樂中

孰能識至樂不計窮與通顏子在陋巷肯憂家屢空

朝從聖師游暮歸無近功忽然若有合此樂固無窮



當時二三子因之開蔽蒙君生百世下久已聞其風  
端居有遐想客至聊從容四壁倚蓬蒿萬卷蟠心骨  
回視世所求失道迷西東此樂既不遠欲往吾其從  
寄范四弟十弟一無十弟二字

春日紀事寄內外諸弟三首

俗事紛紛如亂麻又扶衰病轉天涯文章老矣思吾  
弟頭角蘄然勝外家異味幾回占食指遠書終夕望  
燈花何時更住城南寺共聽春池兩部蛙

水生溪漲欲容舸疾病因循厭作勞莫道深居便無  
事午窻苛瘡費屣搔

自聞賊報離揚州準擬春來泰出游所恨溪山最佳  
處不容老子便歸休

長閑漸化讀書癖遠道聊因避地行安得薄田了饘  
粥便相依倚過平生

寄諸弟

九年在奔走一飽費經營此日窮居意它鄉獨往情  
相憂只有病所至但論兵尚喜吾諸弟形模遠勝兄

游鳳池

遠近諸山翠作堆鳳池北望更崔嵬青松夾路攬天  
去白鳥翻雲旁海來喜有故人同出郭屬因衰病阻  
銜盃猶憐不赴對床約獨上籃輿日暮回

題孫子紹所藏王摩詰渡水羅漢



閭渠褰裳欲何往彷徨徒倚滄波上至人入水固不  
濡何以有此恐怖狀我知摩詰意未真欲以筆端調  
世人此水此渡俱非實摩詰亦未嘗下筆孫郎寶藏  
今幾年往來周旋兵火間世人險阻更百難彼渡水  
者安如山請君但作如此觀莫更思惟尋筆端

送筍與何晉之

年來念念欲深藏頗覺看書氣味長莫怪囊空無一  
物猶能分筍送何郎

次韻李伯紀園亭

昔者翺翔雨露邊已將勲業畫凌煙便尋松菊同元  
亮不訪丹砂學稚川可但海山勝綠野頗知風物似  
平泉小園只在虛窻外佳處常當几杖前  
本無俗事可裝懷藥圃花欄應手栽乘興聊陪野僧  
坐賞心時許故人來頓令此地成三絕不爲它鄉賦  
七哀鍾鼎山林兩無礙豫章須是棟梁材

送林之奇少穎秀才往行朝

我爲福唐游破屋占城市城中幾萬戶所識一林子  
翦然衆木中見此真杞梓未爲棟梁具且映風日美  
子之於爲學其志蓋未已上欲窮經書下考百代史  
發而爲文詞一一當俊偉夫豈效鄙夫念彼不念此  
今來赴行朝學已優則仕窮通決有命所願求諸已  
聖賢有明訓不在拾青紫丈夫出事君邪正從此始



鄭昂用岑參太白胡僧歌韻作楞伽室老人

歌寄杲老

楞伽室中絕皂白去天何止三百尺只今更住最高  
峯齋無木魚粥無鍾已將虎兇等蠱蟻更許蛙蚓同  
蛟龍聞道說禪通一線為爾不識楞伽面一生強項  
吾所知氣壓霜皮四十圍世人未辯此真偽敢向楞  
伽論是非諸公固是舊所適鄭驊從之新有得欲將  
此意向楞伽但道鵠鳥同一色何止一作未到

贈王周士諸公

空房夜氣清落月傍簷明念我平生友相望隔荒城  
寒老未狀書破窓猶短檠君亦不奈得一作閑默坐數

殘更共結香火社同尋文字盟王子潮州來一笑冠  
歌傾午飯展僧鉢村醪傾客鉗相逢但談道絕口不  
論兵未免俗眼笑屢遭時輩輕人生各有趣小大俱  
有程譬彼澗底松難伴池中萍雲鵬與斥鷃已矣兩  
忘情一洗瘴海耳此言君可聽殘更一作長更

贈范信中

異時攜客醉公家蠟燭堆盤酒過花萬里溪山隔春  
事十年風景困胡沙鄭莊好客渾如昨何遜能詩老  
更佳但得尊前添一笑莫一作言漂泊在天涯

會稽石道叟教授南劔兵火搶攘之餘興治  
郡學尺椽片瓦皆其所自經營也未暮月而



學成遠近賴之又祠前輩賢者以風勵多士  
使游其間者望之而心化由是而入堯舜之  
道不難也古之教者蓋多術矣五帝憲三王  
有乞言憲賢於乞言也道叟知之矣呂本中  
為作詩叙本末云

聖遠道則微世久學欲絕區區續微言未易勝邪說  
石侯東南秀睹此心欲折分教南劔州意在補亡缺  
歛令兵火後復見俎豆設廟貌甚尊嚴上下有區別  
先生默無語風化動閩粵斯文自明白如仰見日月  
坐令穿鑿悞不待湯沃雪不知旁祠誰今代古豪傑  
孰能之齊共此歲寒節入門日在望未返意已竭

賢來正心術不在費頰舌乃知薰陶功自與聞見別  
參魯回不愚亦豈有優劣此理儻可求萬古同一轍

前輩謂陳了翁也

寄計議弟張彥實錢元成夏庭列

遠書來稍稀叔也經月病微官自拘束歸興復未定  
誰能相勞苦頗亦奉朝請安身子有道可保在不競  
寧聞鄭子真肯待當世聘張錢平生歡未貴渠有命  
舊交餘此人豈減昔日盛夏郎來幾時問學當轉勝  
高風隕寒梧想助筆鋒勁同歸定何日不必有三徑  
相從說平生保此一室靜

寄內一作家弟并示仲輔諸公



江浙音書絕不聞每逢時序歎離群一秋多病常嫌  
客短日無聊只閉門淺學未容窺易象舊書嬾一作聊  
復誦玄文莫言者舊彫零盡海內交游尚數君

簡范信中

詩人例窮君不然畫堂繡戶羅嬋娟當時乘醉出三  
峽至今妙句留西川底事新來多退縮梅花滿眼看  
未熟便期載酒約來冬似要惡詩相抵觸曉來寒凜  
似中原君忍閉門清晝眠我病猶能相追逐知君心  
期終不俗但攜二妙喚諸公一醉落花吾亦足

東萊先生詩集卷第十四

東萊先生詩集卷第十五

呂本中居仁

再簡范信中兼呈張仲宗

昨日之游樂不樂主人愛客亦一作客不惡梅花遠近

遍川谷雨練一作練風揉未全落明日之游復如何城

南城北梅更多對酒我不飲把盞君當歌酒角雖勤

主人費且幸吾黨頻相過梅花縱落君莫歎與君同

住海南岸花開花落都幾時君醉我醒人得知相逢

一笑俱有詩如何不飲令君嗤

寄晁恭道鄭德成二漕

二年住閩中不識建溪茶處處得殘杯顧未慙齒牙  
飢腸擁滯氣病眼增昏花故人持節來憐我病有加



餘當餉絕品不但分新芽蒼壁月墮曉寶勝金披沙  
一洗肝肺淨兀坐如還家陰雨久不解天氣復未佳  
持詩寄兩公請爲交舊誇便續北苑譜即日定等差  
連得夏三十一爨兄弟范十五仲容趙十七  
穎達書相與其勤作詩寄之

閑居病亦侵世務每絕念猶憐二三子從我久未厭  
書來不改昨意苦辭亦贍問我來何時期我早會面  
我行但謀食欲去復未便要當相就居同止山水縣  
讀我所傳書亦足滿素願開卷忽有得如飲醇酒醞  
吾聞古志士學也蓋有漸欲升夫子堂不摘屈宋豔  
倒籬望青天豈必在窺覘亡時儻從容此語子可驗

送錢子虛撫幹往洪州赴新任二首

君不求時用居然如病夫經過閱歲月相伴走江湖  
白玉終無玷寒松保不枯同官多勝士總爲致區區  
老矣吾無用歸歟子未宜端能出奇策略爲濟斯時  
悶有書遮眼閑須笏拄頤西山有爽氣當報故人知

題晁恭道善境界圖

疇昔相從三十年如今休去不逃禪知君參見法輪  
老始悟蒼蒼便是天

境界本來無善惡人間何處有新圖欲知箇裏真消  
息臘月寒松永不枯

簡乾元珪老



問訊乾元老江頭幾日回  
還應艤船待不作御風來  
漫有經旬別頻思一笑開  
庭前荔子孰尚要著詩催

贈楊紹祖

城東往還者相近得楊卿  
處世如無事為官不近名  
匣藏防身劔案有讀書檠  
此外唯尊酒時時喚客傾

謝宇文漳州送茶

暑氣侵人病逾劇虛堂坐  
調出入息漳州太守送茶  
來王圭小鳳俱無敵太守  
憐我病無語故遣此茶相  
勞苦千金一餅君未許百  
金一盞如潑乳其它鬪芽  
未足數下視紛紛等塵土  
病夫未飲病先愈坐覺爽  
氣生肺腑城中車馬鬧如  
雨更有樂善如君否

夏日

暑雨遂經月客來因稍踈  
閉門觀易象反復看何如  
妙處元非畫微言不在書  
故山初未遠舉首是吾廬  
過劉忠顯公鄉縣作

疾風知勁草世亂識忠臣  
自古有此語今代豈無人  
劉公生東南節義邁等倫  
時危出一死以捍胡馬塵  
遂今天驕子稍知吾道尊  
至今生氣在凜凜凌層雲  
我行崇安野瞻望彼高墳  
流澤既未遠有子賢而文  
會當廣德業早為建殊勳  
此意苟不泯楚人生伍員

夏日深居二首

忽忽車馬去言還因病深  
居未得閑更為故人留一



夏稍移行李過東山

故人多住城東寺還許相過結淨緣  
海寇求降荔枝熟是中風月可忘年

乾元副寺欲還雲門

子有四方志雲門尋舊游溪山往時夢江海向來秋  
物態隨高下生涯任去留閑將問庵主如此是禪不  
慶堯侍者以詩相贈偶成絕句謝之

滿城車馬雜塵埃所至如雲撥不開只有西禪堯侍  
者肯衝劇暑送詩來

渴雨簡張仲宗二首

強讀文書不補飢只今一飽尚難期薄雲未肯蘇禾  
稼細雨才堪濕荔枝

雨濕平林松桂香斷雲冉冉拂踈篁江山故自可人  
意從此歸休策最長

謝楊紹祖惠玉友

我來閩中居中熱久斷酒端居苦無事神氣思內守  
故人憐我病小缸送玉友極知此不凡嶺海見未有  
感君意則重納約況自曠欣然洗盞嘗不待捧素手  
空盃貯玉色一洗市沽醜坐令百疾去敢復望升斗  
從今破酒戒可以入道否

與李似宗別後奉寄

昔者相過幾時心期雖在事多疑滯留江海君先



病悵望雲山我欲歸老境猶存作詩苦故人多有食  
言肥漢陰老父如無事肯復逢人論是非

作雨不成旱暑愈其未能就道

三日陰風雨不成坐嫌衝暑作宵征敢因貧故累公  
子尚欲閑時尋友生兵甲未休心已醉詩書頗廢眼  
猶明便須準擬庵居用柱杖繩牀折脚鐺

聞鵲

一夏病如此它鄉閑未回踈簷聞鵲喜知有遠書來

荔子

南征未苦厭關山荔子今年已厭餐時有野僧來獻  
供每煩佳士約同槃門前炎暑三伏旱坐上冰霜六

月寒它日一尊須念此中州傳買半梨乾

乾元真歇數約它日同庵居

與君俱自走天涯何處雲山不是家城市少留真夢  
事林泉高卧亦空花又無佳句彫肝腎漫有微言到  
齒牙它日一庵如可必願分齋罷半甌茶

將發福唐

一云別李叔易兼簡士珪

盡此一囊粟我行當有期涼風吹天涯增我別後思  
結束向行在問子還一作來何時初無濟時一作世策處

事多參差環視中所有無一施可宜形骸又已病敢  
徼當世知不蒙朋友責定遭兒輩嗤矧此世外人勸  
歸常恐遲相尋有如日請盟吾此詩



聽雨

日數歸期似有期故園無語說相思芭蕉葉上三更雨正是愁人睡覺時

未利

香如含笑全然勝韻比醪釀更似高所恨海濱出太遠初無名字入風騷

聞二弟召對

晚來忽雨已如秋竹枕欹眠得自由忽報諸郎例升進頗容老子便歸休人傳胡虜三年旱勢合山河一戰收顧我迂踈最宜病祇應隨處是菟裘

夜涼早起尋李貽季陸慶長所惠詩有作

夜長忘陰晴忽聽簷雨滴空房閉重門涼氣通枕席欣然欲攬被如覓舊相識那知庚伏內得此睡通夕起尋兩君詩令我生氣力成蹊長桃李已自除荆棘遠游得數士舍此百無益挑燈視皮膚不顧蚊齧赤因之不復寐爲子增歎息

聞大倫與三曾二范聚學并寄夏三十四首

我思臨川居欲往意未慊每懷二三子歲月多荏苒後生名御所習正是絲在染未須極軒昂且須就收斂舉動思古人此志豈不遠才雖有高下事亦要強勉願爲江海深莫作盆盎淺

世人爭錙銖未語色已變居然面頸赤自處亦已賤



寧知烈士曾渠白有志願一介不妄取萬鍾吾亦倦  
古人有伯夷名冠太史傳

見人輒有求所以百慮非但能守簞瓢何事不可爲  
愚夫飽欲死志士固長飢出門萬里塗其亦御名所之  
莫惜一日勤而忘終身憂農夫力耕作其必歲有秋  
月前不鹵莽久亦有倍收少年不努力長大復何求

別法一上人

我有江浙役子能乘興來便同湯院浴卻爲故人回  
此道恐遂絕後生良可哀試尋鑰匙子一一與重開

別後寄珪粹中

一作鼓山

海上相逢兩過秋飄然乘興亦悠悠送行百里還歸

去同是江湖不繫舟

哭王元邁

紛紛舉手爭毫末砥柱當河獨不流一夕便隨波浪  
沒天涯黃葉更悲秋

別林氏兄弟

二年住閩嶺所閱足青紫那知萬衆中得此數君子  
相從不我厭但覺歲月駛高論脫時俗如風濯煩暑  
出處雖未同氣味固相似人生有離合一作低昂所畏爲  
物使要當啜英華不必計粗滓它年肯相尋在彼不  
在此

本中欲謀它日復來福唐之東山林少穎請



作詩以記因成兩絕

老大馳驅百不宜敢將筋力蹈危機  
它年更欲眠雲住同過東山嘗荔枝

更作東山住尋盟尚有詩看君騰踏去  
及我未歸時

謝人惠陳家紫

煩君惠我陳家紫萬里漂流合得嘗  
莫道聞名不相識舊曾隨邊實到吾鄉

閑居感舊偶成十絕乘興有作不復詮次

四海交游一信民後來情分更誰親  
可憐相伴谿堂

老一去塵寰三十春汪信民謝無逸

一世聲名高與關亦知不合注人間  
不令整頓乾坤

了虛逐松聲半夜還高茂華秀實關沼止叔

壁老投冠去學禪堂堂一作鼓陣無前平生老伴

唯均父馬病途窮不著鞭饒節德操夏倪均父

屏醫卻藥病良已絕學捐書我又休  
卻到舊時行履

處五湖煙水上漁舟

萬里飄然不繫舟老來專憶舊交游  
西風日短中原

路虛度江湖數十秋

唐子直心絕可憐夏侯苦節更誰傳  
諸晁事業風流

在各有殘詩數十篇唐廣仁充之夏侯髦節夫晁載

之季此沖之叔用

平生親愛獨諸晁也相親共寂寥  
半日不來須折



簡暫時相遠定相招叔用

病夫長病合長飢豈復輕隨世上見雲雨覆翻渠有分江湖潦倒我無知

曾郎學行冠姻親趙子才能又絕倫仲弟故應同二妙一時先後委埃塵曾元似趙才仲及余仲弟也

便欲長休老未能爾來頻愧住庵僧直須棄盡人間事始見從來一點燈

溫泉一作福州湯院

海上秋來早晚涼客愁蘇醒似還鄉歸途尚欲撩瘡疥剩乞溫泉一勺湯

將去福州

委曲隨人从未甘翛然午枕睡方酣功名到此終無分身世從來百不堪爲己工夫今粗曉住山活計舊相諳它時不用求三徑投老才須住一庵

初秋

涼風驚木葉意欲作深秋客病渾如昨囊空却自由因閑得飲酒端坐勝封侯寄語平生友當能爲我謀

奉呈鼓山雲門二老

汝水相逢今幾年只今同住海南偏月明本自無虧缺山色何嘗有變遷它日會逢兄弟語一時驚散野狐禪儻因居士閑開口却作冲和二月天

從叔巽叔覓茶



疾病侵凌轉不堪時思一室奉清談嗣宗已餉兵厨  
酒當有新茶惠阿咸

福建界首寄福州親舊

海上秋風吹客衣婁煩親舊送將歸今朝更入江東  
路便恐書來即漸稀

嚴州九日坐上贈胡明仲常子正

今年得交舊九日會嚴州城角風雲暮天涯景色秋  
功名有長缺行李付扁舟苦恨三年別聊因一笑留  
病添文字嬾老恥稻梁謀活國須公等吾生便可休  
方允迪挽詞二首

已矣儒林老今為地下郎空山留几杖遺藁漫文章  
徑狹風霜遠溪深草木長傷心釣臺路千載闕幽光  
惟君好兄弟少小共聲名豈止千人傑俱為一代英  
云何卧丘壑不使至公卿慟哭松風遠悲雲咽莫聲  
程伯禹母夫人挽詩二首

父矣閨門秀端如玉在淵相夫成令德教子作名賢  
遽逐秋色盡空令莫景遷傷心江左地松栢閉新阡  
舊隨賢子後每得熟嚴規未獲升堂拜空成相挽詩  
爵頻賜湯沐壽不至期頤它日家聲在流傳世未知

送范師厚宣諭四川

老境侵尋久廢詩送君寧復似當時虺隤病馬猶長  
路偃蹇寒松只舊枝想得山川瞻使節便令父老識



家規

使成都公嘗

聖朝本意惟寬大網漏吞舟始合宜

王導嘗遣八部從事之部顧和在傳還從事見導  
人人各言二千石長短和獨無言導問之和曰明公  
為政當使網漏吞舟之魚豈可採  
聽風聞察察為政導咨嗟其言

贈了老

前年見公滄海上法會堂堂萬騎將今年見公浙河  
東猶是當時舊老翁送行更有天童老騏驎齊驅獵  
霜草野狐射干膽欲破不但獨噴羣馬倒我衰且病  
百念絕便得從公不為早忘情遁跡亦未是言與不  
言俱一掃世人擾擾不歸家公行問渠有何好

東萊先生詩集卷第十五

東萊先生詩集卷第十六

呂本中居仁

送楊晨當時赴夔漕

楊侯從舊名籍籍吳中一見如舊識憐我衰頽病已  
侵怪我辛勤百無益今君遽作巴蜀行江頭宿昔春  
水生路經三峽不艱阻遍與疲氓問疾苦隨身長劍  
莫輕舞試伐蛟鼉斬豺虎北來人士眾如雨得君此  
行尉羈旅君但垂情一笑許勝使區區入州府百城  
因之遂安堵亦勝無事閑坐否

送徐林稚山赴江西漕

總角相從四十年如今衰病已華顛又無耆老可訪  
事尚喜交游不乏賢未使從容持從橐却令辛苦上



江船百城編戶皆疲瘵日望公來與息肩

將發金陵奉懷張彥實

老矣君何往翩然我欲歸文章晚未用歲月事多違  
江接鄱陽路風吹游子衣不應遽伯玉獨悟昔年非

初離建康

一云鍾山寄范十四弟諸人

嘗憶它年出舊京汴隄榆柳與船平寧知此日鍾山  
路亦是東行第一程

紛紛車馬未言還我獨支離便得閑尚有同門二三  
子肯同今夜宿鍾山

寓會稽禹迹寺

陰雨靜不出端居還自由客衣從短褐天氣已深秋  
所在兵猶鬪中原亂不休廟堂如有意更與萬人謀

會稽初秋四首

今來留滯浙河東想見閩山荔子紅雖有故人家在  
彼可無方便託西風

張侯問舍復何時我亦留連去未期便欲爲君草堂  
客幾時先寄落成詩

故園回首但斜陽所至奔波避賊忙天下何曾有定  
處越南燕北是中央

病來每有居山興老去初無住世心三尺枯桐無舊  
譜始知三歎有遺音

錢遜叔侍郎奉京師舊墳改葬天柱謹成挽



詩一首

錢氏霸吳越功德在斯民遜王早退居身退道益尊  
至今二百年盛事傳後昆文采震本朝豈惟光一門  
後來翰林公又以直聲聞累葉其外家家世悉殊勲  
善惡久乃效其報於此分裔孫傑立者迎喪自中原  
遂令擾攘後得安久旅魂依依天柱山不必京洛塵  
死者如有知當言吾有孫小人託末契所恨老不文  
睹此一時盛忍終無一言越水流不竭越山旱不昏  
孝子亦不匱錫類到仍雲

重陽日西興寄臨安親舊

我來西興口君在龍山旁如何阻一水不共作重陽

別浦潮猶白深秋菊未黃遙知對杯酌不記是它鄉

范伯言藥隱

一云送范彥行歸西山

烈士故徇名中民但榮官寧知陋巷士堅坐有餘歡  
出從聖師游歸坐守一簞出門視天壤密邇心自寬  
范侯嬾仕宦決意歸西山西山有藥隱此地可盤桓  
誓言將從古人上追孔與顏有田可以耕有屋可以安  
寧能伴兒曹日夜不得閑我亦倦游者世味更百難  
夢寐想君家父子兄弟間便當卜鄰居一生長往還  
相依得情話出語清肺肝後生有郢質更為斲其漫  
君行問安否此盟當未寒

題趙祖文盤谷圖



趙郎落筆寫盤谷正是太平無事時今日太行那有此滿川樵採盡胡兒

送胡明仲知永州

君行西游浮沅湘洞庭岳麓天一方嶽前老人望君  
又歲晚不嫌歸路長晴天萬里去鴻鵠韞玉未售猶  
深藏遠行固是君素願多畜奇謀羞自獻後生紛紛  
了目前大策定非凡所見簿書汨沒渠自忙道里崎  
嶇吾不倦百川東下倒狂瀾要君嶷然如斷山我老  
無用逢多艱敢復著腳塵埃間曾次偏塞良未寬日  
夜矯首須君還運斤成風君不難不使世人漫鼻端

孫肖之短堂

孫郎囊空意自滿自謂身長才則短以短名堂堂未  
成長短是非俱不管嚴州一見鬚蒼浪贈我新詩如  
夜光何時到君短堂上更話如今歸興長

贈孫肖之

子窮非一時所歷固長久自從太平時以至戎馬後  
今茲益窮甚所至但縮手遂令甑生塵不止衿見肘  
未能脫身去且作避地走金盤貯火齊孰視不一取  
溪船下濤江亦未遠南斗固知松柏生必不在培塿  
見我嚴州城世事懶到口念子抱奇才自守空自守  
簞瓢在陋巷世亦如此不乖離勿重言寒甚且飲酒

朱成伯秀野堂



客愁固多岐我懷亦蕭散連年尋故人見子二水岸  
官居少閑暇歲月忽已換有堂名秀野未入俗眼看  
得名自君子可當清淨觀未能藝桃李且自飽藜藿  
荒涼城一隅初不越門限脫身少年場念此已熟爛  
嗟予老病侵閱世蓋多難相逢默無語自足洗憂患  
窮冬足雨雪近市乏薪炭時來上子堂尚得一笑粲

次秀亭韻二首

忽見新亭起廢基暮雲踈雨兩霏霏憑欄一望長空  
遠鑿石新開小徑微治世從今可招隱至人何苦更  
藏輝但若不厭賓朋集之為飄流到眼稀

舟車來往開回環今日陪公得暫閑漸喜著身人迹  
外勝如隨衆馬蹄間縈紆細數溪頭路蒼翠遙看雨  
後山正恐朝廷須舊物不容常此面孱顏

甘棠樓

高樓面面好舉目是溪山急水瀉湍瀨諸峯呈鬢髮  
聊爲半日出得伴使君閑作者風流在承平氣象還  
身雖住世網心已離塵寰未厭陪游數唯愁覓句慳  
高風雖在望逸韻恐難攀咫尺蓬萊路惟公指顧間

師奴病化

伴我閑中氣味長竹輿游歷徧諸方火邊每與人爭  
席睡起偏嫌犬近床能與兒童校幾許賢於臧獲便  
相忘他生尚欲隨吾在要奉香爐漉水囊



受戒不捕鼠聽經如欲鷹誰知兩溪畔今日送亡僧  
舟行至桐廬

乘舟待潮發一日到桐廬物色寒初甚溪山盡不如  
往來真是夢親舊不須書猶勝鳴夷在時容託後車

示兒

忍窮吾有味雕句汝無功客舍置塵裏春愁浩蕩中  
初無買山費真與住庵同更想顏回宅簞瓢亦屢空

陳朝奉坐化

東風吹雨欲翻盆杏樹前頭柳暗村試問老人何處  
去夜來新月又黃昏

嚴州春曉

啓間病常嬰出郭春已老微陰淨新綠轉覺原野好  
故人各漂散頗恨來不早尚有壁間詩猶堪寫懷抱  
是月足陰晦暮春常苦寒閉門猶疾病春物豈相干  
堅坐客已少長貧心自安幽蘭有花在尚肯結餘歡  
子將爲三衢之行下塔僧惠道求詩留題因  
成絕句遺之

欲過城東病不能飛檐高棟想層層半年夢作嚴州  
住一首詩留塔下僧

將適三衢而七弟欲往臨安臨行作詩奉送  
弟要題詩別人還勸我留如何南去路更送北行舟  
處事須遠略擇交當廣求秋風理歸棹爲我上衢州



椿閣

往時椿閣老盛德傳鄉閭至今風流在遺芳殊未踈  
有孫仁者靜遠近伏其賢定知建德民祝令如翁年

弋陽魏令賞音亭

高亭已寂寞山水自清音主人去亦久此意誰復尋  
夢回還舊觀川上有微吟於焉繼前作因見平生心  
建安熊述之爲令建德不言而民治將適三  
衢留詩美之二首

熊卿治建德隱几心若水民肥吏乾枯亦不用笞箠  
問子何能然此豈力可使建安今多賢於子可見爾  
建安固多賢故人劉與胡山川古悉潤珠生崖不枯

我病日已懶觸事見迂踈行當脫身去一屜從子居

擬古樂府

高堂陳八音同聽不同樂狂飈送鴻鵠萬里翔寥廓  
一去三十年事事非前約當時綠綺琴塵埃無處著  
時節非不以此意但如昨

己未重陽

病無佳思只深藏漫遶東籬菊未黃最是一年秋好  
處可能無酒過重陽

李城拙軒

念彼巧者勞知此拙者安拙者固無營一生長得閑  
子豈真拙者託此以自宥何嘗曳長裾顧肯卑小官



世人極變態，翻手覆手間。子獨如不聞，默坐安如山。  
九衢走紅塵，本自不相干。我老始見子，古井久不瀾。  
贈子拙軒詩，留子靜處看。當蒙一笑許，敢言愁肺肝。

清御軒

清御軒軒中一事無，午窓高枕似吾廬。世人稱意何須道，乃祖風流正不踈。

將往城南觀音阻雨未果

野寺它年別溪山，浪作秋初涼頗宜。出小雨故妨游僧，老渾無念田荒近不收。猶思五更懺清切，勝蠶謳。

余迪漫浪齋

顏子在陋巷，無一當其心。日惟聖之學，正自惜分陰。

予生千載後，此意尚能尋。齋雖名漫浪，迹豈計浮沉。文字浩今古，不受俗務侵。端如貯美酒，妙處當自斟。臨卷忽有得，如奉君親臨。即此是聖域，子行無滯淫。

無題四首

我病無能到處窮，子才安得尚漂蓬。如何共飲重陽酒，相對無聊似乃翁。

重陽共采東籬菊，却似乃翁年少時。顧我無能甘老病，相尋唯有向來詩。

聞鍾即起待天明，客舍無聊坐五更。何日長風破巨浪，看渠萬里出門行。

平生隨我飯脫粟，靜夜不眠尋細書。可見烏衣諸子



弟從來志業不如渠

邊愁

胡人吹短笛一半是離聲想得南飛鴈雲間亦欲聽  
愁聲晚來急邊塞乍寒時不似江南日愁多只自知

招范四弟

涼風忽滿簑江漢有歸心顧我病如昨憐君窮至今  
苦嫌歸夢短不飲酒盃深試問玉川老何時許降臨

衢州路中

今日衢州路師奴不共行阿童渾似汝只是太麤生

憶福州舊居菊花

問訊堦前菊如今屬阿誰祇應風露底猶記摘殘枝

求趙表之墨

超然堂中墨如戟支撐宗門渠有力參得諸方一味  
禪以此示人人不識病夫見之喜折屐便欲投詩恐  
無益主人不吝是家風會見琅琅送珪璧

陋巷

陋巷客自稀短日寒未到感君時一來得以尉懷抱  
論文有根柢落筆清且奧如歌五弦琴促軫有餘操  
黃花開正繁薄酒可相勞請君尋此盟妙處同一道

示聞生

形容落魄猶須酒疾病因循久廢詩忽見聞郎七字  
句却如汪謝少年時





簡何居厚

我之濟勝具子懷經世才寒窓得一笑陋巷絕纖埃  
白酒難充醉黃花只強開更憐無事日時有好詩來

謝人送酒

它鄉逢故人已覺意氣盛得君雙榼酒起我終日病  
清如兩龔潔氣出徐邈聖乃知無功鄉欲往有捷徑  
一盃吾已足不必待歷聘扁舟下東陽此計或未定

尚欲尋舊韻短拙恐未稱先生肯降臨時掃一室靜



東萊先生詩集卷第十六

文苑已巳



